

Come ogi à dato una guida al trombata dil proveditor di Faenza, è andato a Cluserchio. Et è ritornato questa mane *re infecta*, nè *aliter* serà fin che 'l Manfron non li scriva si dagano a la Signoria. *Item*, di l' instrumento di la cession feno questi conti al signor Pandolfo, à inteso fo fato in Rimano per man di sier Zuan Postumo. *Item*, lo arziepiscopo di Ragusi governador a Cesena, ancora è a Bertonorò, e non vol andar a Cesena fin che 'l non ha risposta dil papa per il caso seguì, che il castelan impichò Piero Salvaroba. E ogi vi andò a lui do oratori di Cesena a invitar intrase in la terra. Rispose non volerlo far fin non ha risposta dil papa, e alta voce disse: « Magnifici ambascatori, io ve vedo molto volentieri per nome di la santità dil nostro signor, dinotandovi, et stati di bono animo, che sua santità è diliberata far restituir a li venetiani tutto el stato hanno da Bològna fin a Fano »; e questo l' à afirmato chi l' udite, ch' è (*persona*) *fidei digna*. *Item*, che fiorentini è di breve per concluder con el castelan di Forlì; e ogni sera se vede far fuogi per el dito castelan, e li vien risposto per Monte Pizol e Castrocaro. Eri fono oratori dil ditto arziepiscopo al signor di Forlì, e stetenò per gran spazio insieme. *Item*, eri vene li a lui uno Thomaso citadin di Faenza, gran amico dil castelan di Forlimpopolo, el qual darà la rocha a la Signoria; lo ha ringratiato. *Item*, si provedi a li fanti; di li è Mathio da Brexa caporal, ha ducati 9 al mexe. *Item*, volea mandar Pin da Bergamo a Cluserchio; li è stà dito non vadi che non l' arà; voria la compagnia di Zuan Greco con 150 fanti e do falconeti, e in uno di l' haria.

298

Di Traù, di sier Dolfin Venier conte, più lettere, la prima di 23 novembro. In materia di Scardona, come mandò li oratori de li con sier Piero Sagredo rimesso a San Zorzi.

Item, di 26, avisa cerca il castello di Vituri, al qual stanno alcuni morlachi (*che*) daniza turchi, et ne ha preso uno di loro et ha confessato; sichè di zìò aspeta risposta.

Item, di 30, come ha fato festa per il novo papa Julio. Et per un' altra, pur di 30, il colateral nostro è stato li e à acetà 23 stratioti è in castello casà; alcuni hanno mojer dalmatine. *Item*, Dimitri Rali non è li.

Di Zuan Giacomo da Vil Mercha', vice colateral, date a Traù a dì 29 novembro. Come, di 40 stratioti, *solum* ha accettà 22; e di Dimitri Rali electi di 46, 21, et Michiel Rali so nepote di anni 15; il resto era paesani e tristi. E bisogna mandarli danari, perchè è mexi 5 non ne hanno. In rocha è

provisionati 36 col castelan, tra i qual ne son 10 hanno donna di Traù, 3 nativi e uno capelan tragarin; di quali *solum* do à cassi, ch' è di la terra; dil resto a ritorno aviserà. In ditta rocha è guasta la cisterna; bisogna riconzarla, e le monition e artilarie è mal governate. A la porta di la terra, è do contestabili con page 15 per uno, tra li qual Lorenzo di Bassan contestabile è absentando per homicidio; e sono page native e artesani. *Item*, a la piazza è do contestabili, *videlicet* Marsilio da Carara e Alvise Foscarini, con page 50. Un terzo è boni; il resto fameglj, paesani e artesani etc.

Di Spalato, di sier Hironimo Bernardo conte e capitano, di 17 novembro. In materia di Scardona etc.; e come si aspeta de li el vescovo di Scardona, vien a visitar quel episcopo de li, col qual parlerà di li danni dati a quel conta'.

Fu posto, per loro savj, expedir Marco Antonio Zambon va secretario a Milan, qual possi menar la fameglia et habi li danari ave Marco Bevazan; e ave tutto il Consejo. Et per Colegio li fo fato la commissione, e si partirà doman.

Fono electi 3 savj dil Consejo, in luogo di sier Marco Bolani, sier Marco Antonio Morexini el cavalier procurator e sier Nicolò Foscarini, che compivano. Et rimaseno: 170 et 16 di no, sier Domenego Trivixan el cavalier procurator; 153 sier Polo Barbo procurator; 102 sier Antonio Loredan el cavalier, tutti stati altre fiate. Soto una balota sier Luardo Grimani fo savio dil Consejo, et sier Andrea Griti ave 75. Passò solo sier Alvise Venier fo consier etc. *Item*, fono electi 3 savj di terra ferma in luogo di sier Cristofal Moro, sier Piero Capello che compivano, et sier Lorenzo Zustignan ch' è intrado governador di l' intrade; ma non passò si non do: 117 sier Hironimo Querini fo savio di terra ferma, et 94, 93 di no sier Marco Dandolo dottor et cavalier, è ambasator in Franza, di sier Andrea. 298* Altri non passò. Fo, soto, 90 et 98, sier Francesco Zustignan fo patron a l' arsenal, poi sier Hironimo Capello fo savio a terra ferma, e sier Francesco Foscarini fo *etiam* savio di terra ferma, e altri. E in scortinio fo principià a non balotar li debitori, *videlicet* savj dil Consejo, sier Nicolò Trivixan procurator, sier Zorzi Emo e sier Polo Capello el cavalier; et savj di terra ferma, sier Zorzi Emo, sier Marin Zustignan et sier Vincivera Zorzi etc.

A dì 30 dezembro. In Colegio. Introe sier Domenego Trivixan el cavalier procurator, sier Antonio Loredan el cavalier, e introno savj dil Consejo; *etiam* sier Hironimo Quirini savio di terra ferma.